


EKALESIA FAAPOTOPOTOGA KERISIANO I AMERIKA SAMOA

OFISA O A'OA'OGA KERISIANO



VASEGA LAITI



FEPUARI - IUNI

2023

TUSI AOGA VASEGA LAITI

Fepuari - Iuni 2023
FA'ASOLOGA O MATAUPU

Aso /Masina

Mataupu

Tusi Faitau

Fepuari 05, 2023	“Alu ma le fa’atuatua fa’amaoni ia Iesu le fomai sili.”	Mareko - 5: 25 - 34
Fepuari 12, 2023	“Ia fiafia e fai mea sili mo le Alii”	Ioane 12: 1 - 8
Fepuari 29, 2023	“Ia aua le fefe e tautala sao”	Mareko - 6: 14 - 29
Fepuari 26, 2023	“MATAUPU FA’AMANATU.”	
Mati 05, 2023	“O igoa o le ‘Au Aposetolo po’o so’o o Iesu”	Mataio 10:1-4
Mati 12, 2023	“Ua ‘auina atu le ‘Au Aposetolo.....”	Luka 9: 1 - 6
Mati 19,2023	“O le tali a Iesu i lona ‘au so’o.....”	Luka 10:17-20
Mati 26, 2023	“MATAUPU FA’AMANATU”	
Aperila 02, 2023	‘O le galuega na faia e Iesu, (Aso Sa Laupama) ina ua oo i Ierusalema	Mataio - 21: 1 – 13
Aperila 09, 2023 (Aso Sa Eseta)	“Ua manumalo Iesu, ua toetu o Ia”	Ioane - 20: 11 -
Aperila 16, 2023	“Aisea na talia ai e Iesu lona oti”	Mataio - 27: 15 - 26.
Aperila 23, 2023	“Aua nei suia lou talitonuga o Iesu na toetu mai le oti”	Luka - 24: 5 - 6
Aperila 30, 2023	“MATAUPU FA’AMANATU”	
Me 07, 2023	“‘Alo’alo ese i le faitogafiti pepelo”	Mataio - 28: 11 - 15
Me 14, 2023	“O le manuia o fanau ma aiga, o le filifiliga a tina” (Aso Sa o Tina)	Luka - 10: 38 - 42
Me 21, 2023	“O le feiloaiga a Saulo male Alii Toetu”	Galuega 9:1 - 9
Me 28, 2023	“Ua filifilia Saulo i le galuega a le Alii”. (Aso Sa Penetekoso)	Galuega 9: 10 - 19
Iuni 05, 2022	“O le suafa o Iesu na savali ai le pipili.”	Galuega 3:1-10
Iuni 12, 2022	“ Ua toe fa’aolaina Tapita e Peteru.”	Galuega 9:36-43
Iuni 18, 2023	(Aso Sa o Tama) “O le alofa fa’a-Tama”	Luka 15:11-32
Iuni 26, 2022	“SUEGA O LE ‘AFA TAUSAGA”	

MANUIA TELE GALUEGA I LE AMATAGA O LENEI TAUSAGA AOGA.

MATAUPU VASEGA LAITI

FEPUARI - 05, 2023 - IUNI - 25, 2023

ASO SA: FEPUARI 05, 2023.

**MATAUPU: “IA ALU MA LE FA’ATUATUA FA’AMAONI IA IESU LE FOMA’I SILI”
TUSI FAITAU - MAREKO - 5: 25 - 34**

SINI: Ia a’oa’oina le fanau ia malamalama o puapuagā, o ma’i ma mafatiaga e o’o i le tagata, na o Iesu lava le foma’i sili tatou te malōlō ai, ma maua ai le filemu, pe ā moni lo tatou fa’atuatua i le Ali’i.

TAULOTO: Mareko 5: 34 *“A ua fetalai atu ia iā te ia, Lo’u afafine e, o lou fa’atuatua ua e malōlō ai, inā alu ia oe ma le manuia, ma ia e malōlō i lou ma’i tigā”*

FESOASOANI MO FAIA’OGA:

E le fou le tala lenei, ae manatu lava e fou i le fa’alogo a si fanau. O le mea lea e ao ai pea ona a’oa’oina le tala ia fa’avae i le lagona e fou i le fa’alogo a tamaiti, ina ia tapena fa’atatau foi i ai lau Susuga a le Faiaoga fa’amolemole. Talofa tamaiti? O le tatou tala o le ā fa’amatala, o le tala i le fafine na ma’i i le ma’i punatoto sa fa’amalōlō e Iesu. O le fafine lenei fai mai le tala, e sefulu ma le lua tausaga o fealua’i lenei tinā ma le ma’i. Na saili fofō solo, ma ua tele ana tupe ma ana oloa sa fa’aaluina ai i le sailia o se fofō o lona gasegase. Peita’i, e le’i mafai ai lava ona manuia ai. (Fa’amolemole lau Susuga, pe afai e mafai ona e fa’amatalaina le ma’i punatoto i tamaiti, ua lelei tele.) Ae mana’omia lou sa’ili’ili i ni fa’aupuga ma ni fa’ata’ita’iga faigofie e fa’amatala ai. Ua e silafia le ma’i, e ma’ale’ale pe a fa’amatala, ae tatau, ona malamalama ai le fanau. E matuā manaomia lou faitau pea i le tala, ma faitau foi i ai le vasega, ina ia manino le gasologa o le tala ma mea na tutupu ai. Fa’amalamalama ni nai upu faigata i le tala mo le fanau fa’amolemole. Manuia tele lou alofaiva i le mataupu o lenei Aso Sa.

FESOASOANI MO LE MATAUPU:

1. Ina ua fa’alogo lenei fafine ma’i iā Iesu, ona alu ane ai lea o ia iā te ia. A’o i ai Iesu ma le motu o tagata, na alu ane lenei tinā ma lona manatu, se’i ona pa’i lava i le ofu o Iesu, e mautinoa lava e malōlō ai. Ua taumafai atu le tinā ma i’u ai lava ina pa’i atu i le ofu o Iesu. Fai mai le molimau a Mareko, na ona pa’i atu lava o le tinā ma’i lenei i le ofu o Iesu, ona utu loa lea o lona punatoto, ma ia iloa ai, o ia ua fa’amalōlōina. Ioe, ua malosi le tinā, ua te’a lona ma’i sa tigaina ai i le sefulu ma le lua tausaga.

2. Iesu: Ua iloa e Iesu ua alu ese atu le mana(malosi) sa iā te ia, ona ia faliu ai lea i tua ma fesili atu i le motu o tagata po o ai lea na pa’i ane iā te ia.

3. Ona tali atu ai lea o ona so’o iā te ia: *“Ua e silafia le motu o tagata e to’atele o lo o fetaomi mai i latou iā te oe, ae e te fetalai mai ea, Po o ai na pa’i atu iā te oe”?*

4. Iesu: Ua tilotilo solo pea Iesu e va’ai po’o ai lava lea na pa’i atu iā te ia. O le taimi lea tamaiti, ua lagona le fefe o le tinā ma’i i le punatoto, o lea na ia savali atu ai ma fa’apa’u i luma o Iesu ma ia ta’utino i le Alii, o ia na pa’i atu i lona ofu ona o lona ma’i e fia malōlō.

5. Ona fetalai atu ai lea o Iesu; *“Lo’u afafine, o lou fa’atuatua ua e malōlō ai, inā alu ia oe ma le manuia ma ia e malōlō i lou ma’i tigā”*

Ioe tamaiti! ua manuia le ma’i punatoto o lenei tinā, ona o lona fa’atuatua, talitonu, fa’amaoni e manuia lona ma’i pe afai e tau lava o le ofu o Iesu e pa’i atu i ai. O le tinā ua leva ona pologa i le ma’i, a’o lea fa’atoā malōlō ona o le mana lavea’i o lo tatou Alii o Iesu Keriso. O le saili fofo ia Iesu, e le na o le tatalo ma nofonono, ae tatau ona gaioi e saili i foma’i, e ala mai ai le fa’amalologa a le Alii.

GALUEGA FA'ATINO:

1. Manaia foi ae fai se fa'atinoga pu'upu'u o le tala.
2. Faitau e se tama le Tusi Faitau, ae fa'atino e se teine le vaega a le tinā ma'i.
3. Fa'aaoga le vasega atoa e fa'atino ai le motu o tagata na fetaomi ane iā Iesu, a'o tau fa'aofiofi ane ai le tinā ma'i.
4. Ia manino i fanau le talanoaga a Iesu ma le tinā, ina ua malōlō.
5. Ia tautuana ia faamalamalama ni upu oi le tusi faitau e te silafia e le malamalama ai le fanau.

PESE: Pese & Viiga #149 fuaiupu 3, mo le tala. (Fati tuai o le pese #134.)

A'OA'OGA:

1. Ia moni lo tatou ola fa'atuatua i le Atua auā e leai se mea e faigatā iā te ia.
2. Talitonu i le mana fa'amalōlō o Iesu Keriso e pei o lana fetalaiga; outou o e mafatia i 'avega o a'u e malōlō ai outou.
3. Tatou saili fofō iā Iesu Keriso, auā o ia o le foma'i sili.
4. O Iesu Keriso, ua na o ia lava le foma'i o ma'i uma lava, tino, mafaufau ma le Agaga.
5. Fa'aopoopo ane e lau Susuga nisi a'oa'oga tāua ua lē maua atu i lenei taumafaiga.

TATALO: Saunia e lau Susuga se tatalo e fa'ama'ea ai le vasega.

Manuia tele le galuega o lenei Aso Sa
 //////////////////////////////////////

ASO SA: FEPUARI 12, 2023

MATAUPU: "IA FIAFIA E FAI MEA SILI MO LE ALII"

TUSI FAITAU: IOANE - 12: 1 - 8

SINI: Ia a'oa'oina ia malamalama le fanau, o le fai mea sili mo le Alii o se olaga tataua lea ia muai iloa e so'o se tagata fa'atuatua i le Atua.

TAULOTO: Ioane 12: 3 *"Ona tago ai lea o Maria i le pauna o le u'u nato tau tele; ua ia u'u ai vae o Iesu, ma sōloi ona vae i lona lauulu; ua tumu fo'i le fale i le manogi o le u'u."*

FESOASOANI MO FAIAOGA:

Ia fa'amalamalama i fanau le uiga o le u'u e pei ona aumaia e le tusi faitau. Manatua e le o le u'u le fa'amamafa o le mataupu, a o le foa'i ma le fa'atinoga a le fafine, o le sini lena o lo'o fia tuliloaina, o le ola fai mea sili mo le Alii. O le u'u e mafai ona fa'amatalaina o se suau'u ua fa'apitoa mo le tino. E pei foi ona i ai lava le u'u po'o le fagu'u a Samoa lava ia, e gaosia mai le popo, fa'atasi ma nisi o lau la'au ma fugala'au manogi ua tu'u i ai, ina ia sasala ma tosina lona manogi. Ia fa'aa'oa'o pea le faitau Tusi Paia a le fanau, aua le fiu fa'amolemole. Ia lava foi le lua mafutaga ma le tusi faitau, e faigofie ai lau galuega. Manuia tele le tapenaga.

FESAOSAONI MO LE MATAUPU:

1. O le u'u o lo'o fa'aaogaina i le tala o lenei taeao, e fa'amatalaina o le fa'amanogi (*perfume*). E fa'aaogaina e fa'amanogi ai le tino. O le u'u manogi e uiga 'ese lona sasala. E lē o fa'amatalaina lea tulaga i le tatou tala ma le tusi faitau. Peita'i, e mafai ona o tatou iloa ma fa'amatalaina lenei u'u manogi i sona manogi uiga 'ese ma sona aogā fa'apitoa. I le manatu o Iuta le so'o fa'alata, o se u'u e ese le taugatā. A taugatā se oloa, o i'inā o lo'o ta'u mai ai le tulaga (*quality*) o le na oloa.

2. Ua fai e Maria le mea sili mo lona Alii. Ua ia manatu ina ia foa'i ma fa'aaogā lana u'u taugata ma le manogi mo lona Alii o Iesu. O se faiga o lo'o atagia mai ai le tagata ua ia ave mea sili mo lona Alii. E mafai foi ona fa'apea, o lana taulaga lava lea i le Atua.

3. O mea tāua ma taugatā i so tatou manatu, o mea ia e tatau ona tatou fa'aaoga mo le finagalo o lo tatou Alii. Fetalaiga a le Alii. (f 7-8) *"Tuu pea ia iā te ia; ua teu e ia lenei mea mo le aso o le fa'ata'imuaga o lo'u tanuga. Auā tou te nonofo pea ma ē matitiva, a e tatou te lē nonofo pea ma a'u.*

GALUEGA FA'ATINO: TALIGĀ FESILI

1. O ai e ana le u'u manogi o lo'o ta'ua i le tala? **Tali:** O Maria.

2. O le ā le galuega na fa'aogaina ai le u'u manogi? **Tali:** Na u'u ai vae o Iesu.

3. Aiseā na fesiligia ai e so'o le galuega na faia i le u'u? **Tali:** Manumanu i le u'u, ona e taugatā.

4. O ai le igoa o le so'o na ia fesiligia le galuega na faia e Maria iā Iesu? **Tali:** O Iuta le Sekara.

5. E lelei pe sese le fa'atinoga na faia e Iesu i le u'u taugata? **Tali:** E lelei toe sa'o atoatoa.

6. Faamata a na i ai sau u'u manogi ma le taugata, e te foaiina mo se isi, pe leai?

Tali: Fa'amalamalama pea e lau Susuga tali a le fanau pe afai o le a esese i lou silafia.

PESE: Fa'amolemole lau Susuga ia saili ane se pese o le tatou Tusi Pese e a'oa'o i le fanau e talafeagai ma le mataupu o le fai mea sili.

A'OA'OGA:

1. Ia fiafia ma faamaoni e foai me silisili mo le Alii.

2. O le foa'i atu mo le Alii, ia faia ma le loto atoa ma le loto fa'amalieina i lona alofa .

3. Aua le loto leaga i mea lelei ua faia e le isi tagata, ae faamasani oe i le olaga fai mea lelei.

4. O le fai mea sili mo le Alii, e le o le manatu ia sili ai i isi, ae ia talia ai e le Alii.

5. E tele pea nisi a'oa'oga tāua e mafai ona e fa'aopoopoina fa'amolemole mo le fanau.

TATALO: Ia fa'amalamalama atili e le agaga o lau Afio le loloto o au Afioga i mafaufau ma loto o le fanau. Ma ia tumau pea lo latou fa'atuatua i lau Afio, e fa'avavau, fa'avavau lava.....Amene.

Ia manuia le aoga o lenei Aso Sa, fa'afetai

ASO SA: FEPUARI 19, 2023

MATAUPU: "IA AUA LE FEFE E TAUTALA SA'O."

TUSI FAITAU - Mareko - 6: 14 - 29

SINI: Ia a'oa'oina fanau ia maua le lototetele e tautala ai i le mea sa'o, pe afai ua latou iloa ni vaivaiga to'ilalo o le tama po'o le tina, po'o nisi foi tamaiti ma so'o se tagata.

FESOASOANI MO FAIAOGA:

Talitonu o lo'o gasolo lelei le galuega fa'a-faiaoga Aso Sa iā outou Susuga, i le tausiga alofa a le Atua. Ia lava pea le onosa'i i la tatou galuega ma fa'alagolago i le agaga o le Atua, e fa'aoloina ai i tatou i lana galuega. O le fautuaga masani lava mo lau tapenaga i vaiaso ta'itasi, o le faitau lava o le tusi faitau ma saili i le agaga e lagolago i lo tatou matitiva i ana afioga, auā nai fanau. E leai lava so tatou malosi ma se potu i le loloto o ana afioga, ae 'oa ma nanea a tatou taumafaiga, ina ua tatou tapena fa'atasi ma le Agaga Paia lo tatou fesoasoani sili.

O le feau lava o lo'o fia tulimataina. Ia aua ne'i fefefe le fanau e tautala i le mea sa'o, e ui lava o matua o lo'o fa'atamala. Ua maua lava pea le fa'afefeina o fanau ina nei aliali le mataga ma le agasala, ona o le tu'inaanau o le tama po'o le tina, pe le o le sauaina ea lea o fanau, o lo'o tau fofoina nei? O le tautala sa'o, ua manatu atonu o le a tau fesoasoani i lea fa'afitauli, pe a lototetele le fanau e

tautala sa’o i le mea moni. Peita’i e ao lava ina a’oa’oina i latou i lea mea taua o le tautala sa’o. Manuia le tapenaga.

FESOASOANI MO LE MATAUPU:

1. O Herotia, o le āva po’o le to’alua o Filipino. O Filipino o le uso o Herota, a’o Herota, sa fai ma tupu o Iutaia. Sa mana’o Herotia e nonofo ma le uso o lona to’alua [Herota] Peitai, sa fa’ailoa i ai e Ioane, e lē se mea sa’o le toe nonofo o i la’ua, ona o Herotia, o le avā a Filipino le uso o Herota.
2. O le ala lea na saili ai e Herotia se auala e fa’ao’o ai le oti iā Ioane. O lo’o fa’aalia ai lona loto naunau ina ia nonofo ma Herota. Le ala lea, o lona fa’aaogaina o si ana tama teine, e fai ma auala e na te maua ai Ioane le papatiso.
3. O le tapenaga o le aso fanau o Herota le tupu, na ulufale ai le tama teine a Herotia ma sa’asa’a i luma o le tupu, mo le ‘au vala’aulia o le aso fanau. Na fesili le tupu i le teine, pe i ai se mea e mana’o ai, na te faia mo ia, so’o se mea lava e o’o i le vaeluaina o le malō, e faia lava e le tupu mo le teine.
4. Ona alu lea o le teine i tua ma fesili iā Herotia lona tinā, po o le ā se mea e mana’o ai e ta’u atu iā Herota le tupu. O le tali a Herotia, fai atu i le tupu e te mana’o i le ulu o Ioane le papatiso i totonu o se tanoa.
5. E ui ina faigatā iā Herota, ae lē mafai ona ia toe fa’afoi ana upu , na fa’ataunu’u ina lava le mana’o leaga o Herotia, ma fasiotia ai Ioane le papatiso.

O Herotia la, e lē o se tagata e lelei lana amio tamaiti. O se tinā e leaga lana mea sa fai, ona ua lē gata ua a’afia ai le ola o Ioane le auauna a le Atua, a’o lona fa’aaogaina foi o lana tama teine, e maua ai le avanoa e fa’ao’o ai le oti iā Ioane. O se fa’ata’ita’iga leaga ua faia e lea tinā i lana tama teine. O se feau aogā foi mo i tatou uma le fanau, aua le ola tau-lamalama i le isi tamaitiiti; ae toa’aga e tatalo i le Alii e fesoasoani mai mo i tatou.

GALUEGA FAATINO:

1. E fautuaina pea le sailiili o lau Susuga i ni upu o le tusi faitau, e fesili ai le fanau e fia malamalama ai, ona fa’amalamalama lea fa’amolemole.
2. **Fesili:**
 1. E lelei le mea na faia e Herotia pe leai? **Tali:** E leai.
 2. O ai Herotia? **Tali:** O le avā po’o le to’alua o Filipino
 3. O ai Herota? **Tali:** O le tupu o Iutaia / O le uso o Filipino.
 4. O ai Filipino? **Tali:** O le to’alua po’o le tane a Herotia. /O le uso o Herota.
 5. Na fa’apefea ona oti Ioane? **Tali:** Na fasiotia e auauna a Herota. / Na tipi lona ulu ma tu’u i totonu o le tanoa.
 6. O ai e ana le togafiti lea na oti ai Ioane? **Tali:** O Herotia.
 7. O a ni a’oa’oga taua sa a’oa’oina e i tatou i lenei mataupu? **Tali:** Aua le fefe e tautala sa’o. Ia fa’ailoa le mea sa’o ae aua le nanaina. O le a tele pea ma nisi mafauauga o le fanau.
 8. Aiseā na ita ai Herotia iā Ioane? **Tali:** Ina ua a’oa’i e Ioane iā Herota, e sā ona fai avā i le avā a lona uso o Filipino.

PESE: Tulei ese, Tulei ese, Tulei ese.....

A’OA’OGA:

1. Aua le ola tau-lamalama e a’afia ai le ola o le isi tagata.
2. Ia lelei le amio auā e le gata ina fialia ai tagata, a’o le silafaga a le Atua.
3. Aua le tete’e i fa’atonuga a ou matua, faiaoga, tagata matutua, ma auauna a le Atua.

4. Aua le fefe e tautala sa'o pe a iloa le mea sese ua faia e le isi tamaitiiti, ia po'o se isi lava tagata, e o'o lava i lou tama ma lou tina. Talanoa ma fa'ailoa i ai le mea moni.

TATALO: Tofi ane se tama e fa'ai'u le vasega i se tatalo.

Fa'amanuia le Atua ia te outou le fanau

////////////////////////////////////

ASO SA: FEPUARI 26, 2023

MATAUPU: MATAUPU FA'AMANATU

SINI: O le toe fa'amautiina ma fa'amanatu i fanau po ua taofi i o latou mafaufau ma loto mataupu sa a'oa'oina ai i latou, i Aso Sa amata o lenei tausaga aoga.

FA'ATINOGA O LE MATAUPU

1. E tu'u atu pea le faitalia i a outou Susuga i faiaoga mo le fa'atinoina o le su'ega e pei ona masani ai i su'ega ua mavae atu.
2. E ia te oe foi le pule i le aofa'i o togi mo le su'ega. Ae fautau atu pea pe a e finagalo i ai, ina ia fa'amaumau togi o nai tamaiti ma fa'amatala lelei i ai le fa'amoemoe e faia ai su'ega, e le o le saili po'o ai e sili, a ia aoga le o ane i le a'oga, ma fiafia atili ai i latou i le a'oa'oina.
3. E taua foi ae silasila i tauloto o lo'o latou a'oa'oina, ina ia tauloto ma manatua Tusi faitau o ia tauloto.

FESILI: O le a tu'u atu pea i a outou Susuga le fa'atinoga o le su'ega, e fuafua i le fanau. Afai e gafatia le tufa o fesili ma tusi e le tamaitiiti lava ia ana tali, ua lelei tele foi lea. Ae afai e leai, e lelei ona auaua'i ane e fesili i ai ae tali gutu, ina ia fa'ataua uma le malosi o i ai i fanau i le taliina o fesili fa'amolemole.

1. E fia tausaga na fealua'i ai le fafine punatoto ma lona ma'i? **Tali:** E sefulu lua. (12)
2. O le a le mea na faia e le fafine na malolō ai lona ma'i? **Tali:** Na pa'i i le pito ofu o Iesu ma lona fa'atuatua.
3. Ina ua pa'i le fafine i le ofu o Iesu, o le a le mea na lagona e Iesu? **Tali:** Na lagona e Iesu ua alu 'ese atu le mana nai ia te ia.
4. O le a le fetalaiga po'o le tala a Iesu na fai i le fafine ina ua fa'apaū faō i ona luma? **Tali:** "Lo'u afafine e, o lou fa'atuatua ua e malolō ai, inā alu ia oe ma le manuia, ma ia e malolō lou ma'i tigā."
5. O le a le mea na faia e le fafine i le u'u manogi? **Tali:** Ua ia sasa'a i lona lauulu le u'u manogi, ma soloi ai a'ao (vae) o Iesu.
6. Na fiafia le 'au so'o o Iesu i le mea na faia e le fafine i le u'u manogi? **Tali:** Leai.
7. Aiseā na le fiafia ai i latou? **Tali:** Ona o le u'u taugatā tele, a fa'atau e tolu selau tenari lona tau.
8. O ai Herotia? **Tali:** O le avā po'o le to'alua o Filipino.
9. O ai Filipino? **Tali:** O le uso o Herota, le tupu o Iutaia.
10. Na fa'apefea ona oti Ioane le papatiso? **Tali:** Na tipi 'ese lona ulu ma tu'u i totonu o le tanoa.
11. O le a le a'oa'iga a Ioane ia Herota? **Tali:** E le tatau ona toe nonofo ma Herotia le to'alua o lona uso.
12. Se mea lelei le tautala sao pe leai? **Tali:** E lelei. (toe fa'amamafa le a'oa'oga lena fa'amolemole i fanau)

Fa'ai'uga: A uma le su'ega o telē pea le taimi, ona fa'amalamalama loa lea i le fanau fesili ma o latou tali sa'o, ina ia latou fa'alogo ai ma iloa a latou tali na tali ane ai i lau Susuga.

Pesepesega: Ia toe faamanatu pese sa outou usuina i Aso Sa ua mavae, ia maua lelei.

Tatalo: Tatalo fa'atasi i lenei Aso Sa i le tatalo a le Alii.

MANUIA LE SAUNI ATU I LE LOTU.

////////////////////////////////////

ASO SA - MATI 05, 2023

MATAUPU – O IGOA O LE 'AU APOSETOLO PO'O SO'O E 12 O IESU"

TUSI FAITAU – MATAIO 10: 1 – 4

SINI – Ia iloa e tamaiti suafa po'o igoa o le 'au so'o o Iesu na valaa'uina mo le galuega tala'i.

FESOASOANI I LE MATAUPU

O le amataina lea o le vala'au a le Alii o Iesu i nisi latou te faia le galuega tala'i. O le filifiliga na faia lava e Iesu i lana lava fa'atatau e tusa o le mea e mafaia e le tagata lava ia. O lona lava finagalo e taua tagata uma i lana galuega tala'i. Ua ia manatu e tatau ona tofia nisi e fesoasoani ia te ia, aua e le faigofie le galuega e fia fa'asoa atu i tagata o le nu'u. Ua uma ona ia faia le fa'ata'ita'iga i le faiga o le galuega, ma ua ia mana'o e fa'aauau e le 'au so'o. O le malosi ma le mana ua ia tu'uina atu e latou te faia ai le galuega a le Atua. O le galuega a le Atua ua tu'uina mai e fa'aauau e ona lava tagata. O le fa'aailoa atu lea o le tala lelei ia Iesu Keriso ina ia fa'aolaina tagata uma.

O le fa'amoemoe ma le 'autu o le tofia ai o le 'au so'o, aua e le nofo mau Iesu i le lalolagi nei, O le matafaioi mo tagata uma e agava'a ai, ae na amata mai e le so'ona filifilia. E sefulu ma le lua i latou na tofia latou te fa'asalalauina atu le tala lelei, e ala i le 'au so'o na tofia. E fa'atatau lea fuainumera 12, e tusa o ituaiga e sefulu ma le lua o Isaraelu.

FA'ATINOGA O LE MATAUPU

1. E fa'amamafa atu pea le faita'uga Tusi Paia a le fanau i le vasega lea, aua le tu'ua.
2. Ia taumafai lava ia taulotoina e tamaiti igoa o le 'au so'o.
3. Ia tofia le tama po'o le teine ma le igoa e fa'aigoaina ai, ina ia mau i o latou mafaufau.
4. E lelei foi ae tago e fatu se pese e usu e tamaiti, e manatua gofie ai igoa o le 'au so'o.

TAULOTO – MATAIO - 10: 2 - 4 (na o igoa o le 'au so'o). *“Peteru, Aneterea, Iakopo le atali'i o Sepetaio, Ioane lona uso. Filipino Patolomaio, Toma, Mataio, Iakopo le atalii o Alefaio, Sakaio, Simona le Kanana ma Iuta le Sekara”*

A'O'A'OGA -

1. O lo'o tofia foi i tatou e le Atua e avea ma ona so'o.
2. E fa'amoemoe mai le Atua ia i tatou mo lana galuega e ala i le avea o tatou ma ona so'o moni.
3. E tatau ona tatou taumafai ia avea i tatou ma so'o o le Alii.
4. Ia fa'aopoopo ane nisi a'oa'oga mo le fanau fa'amolemole.

PESE - Ou te iloa o lau taleni o le fatu pese, fatu se pese e 'ao ai le tauloto ina ia manatuaina pea e fanau igoa o le 'au so'o, a'o laitli i latou. Fa'ai'u loa i se tatalo.

MALO LE ONOSA'I, FA'AFETAI LE GALULUE

////////////////////////////////////

ASO SA - MATI 12, 2023.

MATAUPU – “UA ‘AUINA ATU LE ‘AU APOSETOLO E TALA’I LE MALO O LE ATUA”

TUSI FAITAU – LUKA - 9: 1 – 6

SINI – Ia iloa e tamaiti o le pule a le Alii o Iesu, na latou o ai e tala’i atu le talalelei i le malo o le Atua, aua ua latou o ma le mana, po’o le malosi o le Alii.

FESOASOANI MO LE MATAUPU

I le Aso Sa ua mavae, na talanoaina ai le tofiaina o le ‘au so’o, a’o lenei Aso Sa, ua ‘auina atu e Iesu i latou ia e to’asefulu ma le lua ia o loa e faia le galuega. Ua fa’amanino atu e Iesu le matai o le galuega mea latou te faia ai le galuega tala’i.

O le fa’amoemoe o lenei galuega ina ia fa’amalolo i e mama’i, ma ia fa’aioa atu le malo o le Atua i tagata. O le malo e pule aoao lava le Atua. Ua ta’u atu e Iesu, ia aua lava nei popole i se mea e tasi, aua e tausia lava e Iesu i latou pe a latou o e tala’i atu.

O le mana’o o le Alii e tusa o le talaiga, ia so’o le aai atoa ma ia fa’amalolo tagata ina ia latou malolosi i le mana o le tala’iga. Afai e alolofa ane ni aiga ia i latou fa’amanuia i ai. Aua lava le popole i se mea, aua foi nei o latou o ma ave ni ofu, po’o ni mea e ‘ai ma ni tupe, aua ua silafia lava e Iesu mea uma.

FA’ATINOGA O LE MATAUPU

1. O le vasega lava lenei e faamalosi ai le faitau paia a le fana
2. Ia toe fa’amanino le faitau ma ia toe talanoa i se upu e fia malamalama ai le fanau.
3. Ia fa’amalamalama le uiga o le upu, *auina atu*, ia pe fai i se tasi o le vasega e alu e ta’u se fe’au i se tasi ina ia latou iloa le uiga moni o le alu ma ta’u atu.
4. Ia fa’amatala le aoga o mea taua ia o lo’o ta’u mai i le tala, to’oto’o, taga, mea’ai, tupe, ofutino.
5. Taumafai lava ia fa’amatala mai le tala mai le Tusi Pa’ia, a’o lenei ua fa’apu’upu’u atu mo lau Susuga a le faiaoga.

TAULOTO - LUKA - 9: 6. *“Ua latou o atu, ona fa’ata’amilo ai lea i lea a’ai ma lea a’ai, e folafola le talalelei, ma fa’amalolo i ma’i i mea uma.”*

A’OA’OGA -

1. O le tagata tala’i ia alu lava ma le leai o se mea e alu ma ia i le galuega, aua ua saunia lava e Iesu mea uma mo’i latou. E maua fua mea uma mai le Atua.
2. Ia fiafia e ta’u atu le malo o le Atua i isi tamaiti, e fiafia ai Iesu.
3. A ita se tamaitiiti ia te oe ona o lou ta’u i ai o le igoa o Iesu, aua te ita fua pe popole i ai.
4. E tele pea a’oa’oga faigofie o le ‘auina atu, aua le taofia fa’amolemole.

PESE: – **“ALAGA LE SIUFOFOGA.....”** Manaia si pese lea ma fa’ai’u loa i se tatalo.

- | | |
|--|-------------------------------|
| 1. Alaga le siu fofoga o le Leoleo Mamoe | Tali - Aumai i totonu |
| I fafo le pogisa poo fea o ia | Aumai i totonu |
| Ma valaau i mamoe ua leiloa | Aumai i totonu mai le agasala |
| Ua mamao ma le Leoleo Mamoe | Aumai i totonu ia Iesu. |

MANUIA TELE LE SAUNI ATU I LE TAPUAIGA

ASO SA - MATI 19, 2023.

MATAUPU – “O LE TALI A IESU I ONA SO’O INA UA FO’I ANE MAI LE GALUEGA”

TUSI FAITAU – LUKA 10: 17 – 20

SINI – Ia manino ma iloa e le fanau, le manaia o le fo’i mai ma le fiafia o le ‘au so’o ma le tala ua manuia le galuega tala’i.

FESOASOANI MO LE MATAUPU - O Iesu o le matai o le galuega, na ia tu’uina atu le pule ma le mana, e o ma le ‘au so’o aua le galuega. Sa fa’atali le Alii i ona soo, ae ina ua fo’i ane, o se tala fiafia na latou tau atu ia Iesu. Fai mai i latou, ua manuia la latou tala’iga, ma ua mafai ona latou tutuli i temoni sa ulutino i tagata, ona o le suafa o Iesu.

Sa fo’i mai ma le olioli ina ua tala manuia mea uma, sa feagai ma i latou i le tala’iga. Peita’i, na fa’ailoa atu e Iesu i le ‘au so’o, ia aua nei mitamita se tasi, ina ua usiusita’i temoni ia te’i latou, a ia latou fiafia ma olioli aua ua tusia o latou igoa i le lagi. O le isi mea taua ua manino mai ai, o Iesu lava na fesoasoani ia te’i latou na mafua ai ona faigofie ma manuia le galuega.

FA’ATINOGA O LE MATAUPU

1. Ia fa’amalosia pea le faitau Tusi Paia a tamaiti..
2. Ia fesiligia pea le fanau i ni vaega e le o malamalama ai e tusa ma le tala sa fa’amatalaina.
3. Ia fa’atino le tala e le vasega ina ia malamalama atili ai le tala o le nei aso..

TAULOTO - LUKA - 10: 20. *“A e peitai, aua tou te olioli i lenei mea, ina ua usiusita’i agaga ia te outou, a ia olioli ona ua tusia o outou igoa i le lagi”*

A’OA’OGA -

1. E fiafia Iesu i le tagata e usiusita’i ma fa’alogo i le Atua.
2. E manuia le tagata e fiafia e tala’i le igoa o Iesu.
3. Aua le mimita vale pe a manuia, ae fa’afetai i le Atua.
4. Ia tau lava o Iesu e te mitamita ai i lona suafa, aua e te mafaia ai vavega.
5. Fesili pea i e fanau i nisi a’oa’oga ua latou maua.

PESE - E lelei le fa’amasani i le pese #34 o le tatou tusi pese, ona fa’ai’u lea i le tatalo a le Alii.

MANUIA LE SAUNI ATU I LE LOTU

////////////////////////////////////

ASO SA - Mati 26, 2023.

MATAUPU – “MATAUPU FA’AMANATU”

SINI – Ia toe fa’amanatu i tamaiti mataupu ua mavae ina ia o latou manatua le uiga ma le taua o ia mataupu mo i latou.

Saunia pea e lau Susuga a le faiaoga ni nai fesili e toe fa’atepa ai o latou mafaufau i mataupu ua tuana’i.

FA’ATINOGA O LE MATAUPU -

1. O lo’o i lau Susuga lava a le faiaoga, le fa’atatau i le fa’atinoga o le mataupu.
2. Afai e faia fa’a-su’ega, ua lelei tele, tusi pe tali gutu e le afaina.
3. Afai e te manatu e toe a’oa’o ma fa’amalamalama mataupu uma ai ua galo, ua lelei tele lau Susuga.

4. O lo'o i lau Susuga le tapenaga, a'o le fa'amoemoe ia i ai se mea aoga mo tamaiti.
5. E lua foi vaega ua taumafai atu i ai.

(A). O FESILI MA TALI

1. E te fiafia e avea oe ma so'o o Iesu? **Tali** - Ioe
2. E to'afia so'o o Iesu? **Tali** - 12
3. O le a le isi igoa e fa'aaogaina mo le 'au so'o? **Tali** - O le 'au Aposetolo
4. O le a le tala fiafia a le 'au so'o ina ua foi ane ia Iesu? **Tali** - Ua latou tutuli i temoni i le suafa o Iesu.
5. O le a le tala a Iesu ia i latou? **Tali** - (ua tatau ona manatua le tauloto)
6. O le a le fa'atonuga a Iesu i ona so'o ina o le a o e tala'i le malo o le Atua? **Tali** - Aua le 'aveina, se taga, se to'oto'o, ni tupe, se mea'ai, ma ni ofutino i le galuega.
7. A ita ane sau uo ia te oe ona e te fiafia i le igoa o Iesu, o le a sau mea o le a fai i ai? **Tali** - Aua e te ita i ai ae alofa pea i ai, fai i ai e alofa Iesu ia te ia.

(E). TOE FA'AMANATU TAULOTO O LE NEI MASINA. *Fa'amolemole aua lava le fa'agaloina tauloto, ia a'oa'oina pea ia taofi e tamaiti ia mau o le Tusi Paia. Ou te taofi, e lava le taimi, e lelei pea le toe foi i tauloto o le masima ua mavae, e toe fa'amantu fa'atasi.*

1. **MATAIO - 10: 2 - 4** *(o le taulotoina o igoa o le au soo e pei ona tu'uina atu i le mataupu muamua o le nei masina.*
2. **LUKA - 9: 6.** *“Ua latou o atu, ona fa'ata'amilo ai lea i lea a'ai ma lea a'ai, e folafola le talalelei, ma fa'amalolo i ma'i i mea uma”*
3. **LUKA - 10: 20.** *“A e peita'i aua tou te olioli i lenei mea, ina ua usiusita'i agaga ia te outou, a ia olioli ona ua tusia o outou igoa i le lagi”*

A'OA'OGA - O le a'oa'oga taua lava mo lenei Aso Sa, o le maitauina lea e lau Susuga a le faiaoga, o lo'o alualu i luma le taumafai o fanau. E le gata o le faitau Tusi Pa'ia, o le tali i fesili, a'o le taulotoina o nisi o fuaitau mai le Tusi Pa'ia.

PESE - Ia toe fa'amanatu pese sa tou pepese ai i le nei masina. Saunia e lau Susuga se tatalo ae fa'ata'ita'i atu tamaiti, e fa'ai'u ai le a'oga.

MALO LE GALULUE I LENEI MASINA, ALOFA ATU



ASO SA - APERILA 02, 2023 (ASO SA O LE LAUPAMA)

MATAUPU- “O LE GALUEGA NA FAIA E IESU INA UA O'O I IERUSALEMA”.

TUSI FAITAU – MATAIO 21; 1- 13

SINI – Ia fa’amalamalama i tamaiti le galuega muamua na faia e Iesu i Ierusalem, ina ua taunu’u atu lana malaga fa’atupu i lona lava nuu.

FESOASOANI MO LE MATAUPU

O le malaga fa’atupu a Iesu na alu i Ierusalem. Ua ia fa’atonuina ai ona so’o e o atu i luma o le a’ai, e tatala mai le asini, o le tama a le asini matua, se’i alu ai le malaga i Ierusalem. Na fa’ae’e i luga o latou ofu ma alu loa le malaga, a’o Iesu o lo’o ti’eti’e ai.

O Iesu ma ona so’o sa o i le malaga lea, ae fa’ate’ia i le lolofi ane o le motu o tagata, ma fofola o latou ofu i le ala, ma talotalo lau o pama ma la o la’au, ae o lo’o savali atu ai le asini. O le alalaga a tagata ua fa’apea ane, “Osana i le alo o Tavita, Ia manuia le Afio mai i le suafa o le Alii, Osana i mea e aupito i luga”.

Sa tupu le loto fiafia o le motu o tagata i le malaga atu o Iesu ma le ‘au so’o i Ierusalem. Peitai, ina ua taunuu le malaga, na silafia ai e Iesu le malumalu, ua fai ma nofoaga ua fa’atau ai oloa a le nu’u i luga o laulau. E le’i toe fa’atali Iesu, a ua ia tutuli ma sasa i fafo tagata ma fuli i lalo laulau. Ua manatu Iesu e le sa’o le mea o lo’o faia e tagata o le nu’u, aua foi o le malumalu o le fale tapua’i, e faia ai lotu. O le fale tatalo ae le o se fale fa’atau ai ni oloa.

FA’ATINOGA O LE MATAUPU

1. Fa’amalosi pea le faitau Tusi Paia a le fanau, fa’aaoga tusi o le mataupu ua tu’uina atu
2. E le afaina foi ae sili atu le faitau, e fua lava i le taimi o le vasega.
3. Ia tu’u pea le avanoa i tamaiti e fesili mai ai i se mea e le o malamalama ai.
4. Manaia tele ae fa’atino e le vasega le malaga atu o Iesu i Ierusalem, aua o le a’ano lea o le Aso Sa fa’amanatu leni o le Aso Sa o Laupama.

TAULOTO – MATAIO 21: 13, - *“Ua fa’apea atu o ia ia te i latou, Ua tusia, e ta’ua lou fale, ma fale tatalo, a ua faia e outou ma ana o e faomea.” (mo le mataupu o leni aso)*

FA’AMANATU: Fa’amolemole, ia saunia pea le fanau i le fuaiupu e 9, mo le fa’atinoga o le tala.

NISI O UPU E FA’AMALMALAMA -

1. **Osana** - *Fa’aola mai.*
2. **Laupama** - *lau o le la’au o le, pama.*
3. **Asini** - *o le manu na tietie ai Iesu.*
4. **Malumalu** - *fale tatalo poo le fale sa, fale tapua’i ai i le Atua.*

A’OA’OGA -

1. O le malaga a Iesu i Ierusalem, o le fa’aioaina atu lea o lana pule aoao i le lalolagi.
2. Ua aoao mai le malaga a Iesu le loto mauilalo, e ala i lona ti’eti’e i le asini.
3. O Iesu o le auauna na feagai ma puapuaga e o’o i le oti.
4. E le’i fefe Iesu e sasa ma tutuli i fafo tagata ina ua le ava i le malumalu.

PESE - Pese a le Aoga Aso Sa, “Ua ti’eti’e atu i Ierusalem....i luga o le asini.

MANUIA TELE LE ASO SA LAUPAMA
////////////////////////////////////

ASO SA - APERILA 09, 2023 (ASO SA O LE ESETA)

MATAUPU – “UA MANUMALO IESU, UA TOETU O IA”

TUSI FAITAU – IOANE 20: 11 – 18

SINI – Ia fa’amautu ma fa’amausali pea i loto ma mafaufau o fanau le moni o le tala i le toetu o Iesu, ma lona manumalo i le tu’ugamau ma le oti.

FESO’ASOANI MO LE MATAUPU

O le tala i le toe tu mai o Iesu nai le oti, ina ua o’o atu Maria le Makatala e asiasi i le tu’ugamau. aua ua tolu ai aso talu ona maluu le Alii. O le lagona fa’a - tina e fia asiasi pea i le tu’ugamau o lo’o i ai Iesu. Ua ala usu Maria i le tu’ugamau, ae peita’i e alu atu ua leai se tino o Iesu i totonu o le tu’ugamau.

Na va’aia e Iesu agelu e to’alua i totonu o le tu’ugamau o lo’o nonofo mai, o le tasi e i ulu a’o le tasi e i vae, o lo’o o’ofu mai i ofu sisina. Na tu Maria ma le fa’anoanoa ina ua ia va’aia ua leai le tino o Iesu i le mea sa ta’oto ai. Ona fesili lea o agelu ia Maria, “Funa e, se a le mea e te tagi ai? Na tali Maria ia i laua, “Aua ua latou ave’ese lou Alii, ou te le iloa fo’i le mea ua latou tu’uina i ai o ia” E fai lava tala ia a Maria i agelu, ona ia faliu lea i tua, ma iloa atu Iesu o tu mai, peita’i, na le iloa o Iesu moni lea, aua o lona manatu, o Iesu ua oti, e le toe ola mai.

Peita’i, o le taimi lava lea tamaiti na te’i ai Maria ina ua fa’alogo atu, ua ta’u mai e le tagata lea lona igoa. “Funa e, se a le mea e te tagi ai, o ai ea e te sailia?. O Maria i le taimi lea, sa i ai lava i lona manatu o le leoleo o le fanau le tagata lea la te talanoa, ae na talitonu atoatoa lava o ia, ina ua toe fetalai i ai Iesu ma tau lona igoa , **Maria e**, ona fa’apea atu loa lea o ia, **Raponi e**, (o lona uiga o le - le aoao e,..)

E le’i toe fa’atali Maria a ua oso atu ma le fiafia ua leai se fefe e fia fusi ia Iesu, peita’i, na vavao pe taofi e Iesu, “Aua e te tago mai ia te a’u, aua ou te le’i alu ae i lo’u tama ma lo ouotu tama, a ia e alu ma fai atu i o’u uso, ina o i Kalilaia latou te feiloa’i ai ma latou iloa ai Iesu. Ona alu ai lea o Maria ma fai atu i le ‘au so’o, “**Ua ou iloa atu le Alii, ua ia fa’ailoa atu foi ia te’i latou, ua fetalai mai e ia o ia mea ia te ia”**

FA’ATINOGA O LE MATAUPU -

1. Ia fa’amalosia le faitauga Tusi Pa’ia, e lelei ona amata ona fa’aumiumi atu le faitau i le nei taeao, amata mai le fuaiupu muamau se’ia o’o i le fuaiupu e 18.
2. Ia fa’amalamalama nisi o upu e te silafia e tataua ona iloa e le fanau.
3. Ia fai ni nai fesili faigofie i tamaiti e fa’amautu ai le mataupu.
4. E lelei fo’i ae fa’atino le tala e fanau, e mulimuli lava i le Tusi Faitau, ae fa’atonutonu e lau Susuga i se ala pu’upu’u, ia talafeagai ma le taimi
5. O le taua lava o le falatino ma tautatala i upu o le tala, e manatua gofie ai e tamaiti, ma taofi mau i ai.

TAULOTO - IOANE - 20: 17. “**Ua fetalai atu Iesu ia te ia, aua e te tago mai ia te a’u, aua ou te le’i alu a’e lava i lou Tama, a ia e alu i o’u uso, ma fai atu ia i latou, ou te alu a’e i lo’u Tama ma lo outou tama, o lo’u Atua ma lo outou Atua”**

A’OA’OGA -

1. O le toetu o Iesu e le o se tala pepelo po'o se tala fa'atupu, o le tala moni lava.
2. Ia tatou fa'afetai i le Atua ona o le toetu o Iesu, ua magalo ai a tatou agasala.
3. Ia tatou fiafia e tala'i atu le tala moni ua toetu Iesu i a tatou uo ma tagata uma.
4. Aua tatou te fefefe e ta'uta'u le toetu o Iesu.
5. Fa'aopoopo e lau Susuga nisi a'oa'oga faigofie i le fanau fa'amolemole.

PESE - Fa'amasani le fanau i le pese #51, o le tatou Tusi Pese. Fa'ai'u i se tatalo e saunia e lau Susuga a le faiaoga.

ASO SA - APERILA 16, 2023

MATAUPU – “AISEA NA TALIA AI E IESU LONA OTI?”

TUSI FAITAU – MATAIO - 27: 15- 26

SINI – Ia malamalama tamaiti, e le'i musu Iesu i lona oti, o le a o'o mai, aua o lana galuega fa'aola mo le lalolagi.

FESOASOANI MO LE MATAUPU

AISEA NA TALIA AI E IESU LONA OTI? (*Fa.amatala fa'afaigofie e lau Susuga se tali faigofie mo tamaiti, ona fa'amatala loa lea o le mataupu*). O le tala o le a tatou talanoa ai tamaiti i le nei Aso Sa, o le tala i le fa'amasinoga o Iesu i luma o le motu o tagata. O le a foi lea mea o le fa'amasinoga? Ae e i ai se tamaititi e ta'u maia, o le a le mafua'aga na fa'amasino ai Iesu? (fa'amalamalama fesili ia, ona fa'aauau ai loa lea o le tala). Taumafai pea e fa'asolo le fa'amatalaina o le tala mai le Tusi Paia, a'o lona ua 'oto oto atu mo lau Susuga. Fai mai le tala tamaiti, sa fesiligia pea e Pilato le motu o tagata, po'o ai e manana'o e tatala atu, po'o Iesu po'o Parapa. O le alalaga mai o tagata ia Pilato, ia tatala mai Parapa ae fa'asatauro ia Iesu.

Na iloa e le ava a Pilato le fa'aaliga i le po, ina ia aua nei faia e lona to'alua o Pilato se mea leaga ia Iesu, ae peita'i, na usita'i lava Pilato i le mana'o o le motu o tagata. O Parapa o ia o le pagota, a'o Iesu e leai sana agasala, a ua fa'asala e le motu o tagata.

E le'i talia e Pilato le upu a lana ava na ia logo atu i ai, ia oe ne'i e mao i lona tagata. Na fafano lima o Pilato, o le fa'aailoga o ia e mama, a ua ia tu'uina atu i le motu o tagata latou te faia le i'uga. Ua fa'ataunu'u le mana'o o tagata o le nu'u, ua tatala mai Parapa ae fa'asatauro ia Iesu.

FA'ATNOGA O LE MATAUPU

1. Ia faitau felafolafoa'i tamaiti i le Tusi Paia, ma taumafai e fa'asa'o le ta'uga o upu..
2. Ia fa'amanino ma faamalamalama nisi o upu mai le tusi faitau e faigata i fanau.
3. Ua oto atu se vaega o le tala, ae le afaina pe afai na e tapena i le tala atoa o lenei vaitau. (taumafai e fa'apu'upu'u, ae tulimataina pea le fa'amasinoga o Iesu)
4. Ia maua se taimi e fa'atino ai e le vasega le vaega o le tala na fa'amatalaina.

TAULOTO - MATAIO - 27: 26. “Ona tatalaina atu ai lea e ia o Parapa ia te i latou, a ua sasaina e ia o Iesu, ma tu'uina atu o ia ia fa'asatauroina”

A'OA'OGA

1. Aua le pepelo e pei o tagata na alalaga e fa'asatauro Iesu.
2. E mana'o Iesu ia manuia i tatou i le alofa o lona tama.
3. E le'i fefe Iesu i le oti, aua na ia iloa. e leai se mea e le mafaia e lona tama.
4. O le ola ususita'i o Iesu i lona tama, na le fefe ai i le oti.
5. Ma nisi a'oa'oga fa'amolemole ia faigofie i tamaiti.

PESE - Fa'amasani fanau i se fuaiupu o le pese #73, o le tatou tusi pese. Fa'ai'u i le tatalo a le Ali'i.

MANUIA GALUEGA O LE ASO SA

////////////////////////////////////

ASO SA - APERILA 23, 2023.

**MATAUPU - “AUA NE’I SUIA LOU TALITONUGA, O IESU NA TOETU MAI LE OTI”
TUSI FAITAU - LUKA - 24: 5 - 6**

SINI - Ia fa’amamafa pea i fanau le tala i le maliu ma le toetu o Iesu i lenei masina, ina ia aua ne’i avea le tala o le toetu o Iesu, ma tala e masalosalo i ai i latou, a’o tele mai le mau a’oa’oga i le tala lea. Manatua o le fatu lava lea o lo tatou fa’atuatua.

FESOASOANI MO LE MATAUPU -

E lelei le fa’amatala i tamaiti le tala i lona faasologa e pei ona faamatala e Luka. Fai le tala, sa o i le tafa o ata. O lona uiga o le taeao segisegi. Ua latou o ma ave mea manogi sa latou saunia e asi ai le tu’ugamau o Iesu. Ina ua latou latalata atu i le tu’ugamau, ona latou iloa ai lea o le ma’a ua fulieseina mai le gutu o le tu’ugamau.

Ua latou ulu atu i totonu o le tu’ugamau, latou te le’i iloa ai le Ali’i ma lona tino, ua fememea’i foi i latou uma. I lea lava taimi, na tutu mai loa tagata e to’alua o lo’o o’ofu i ofu pupula. Ona latou matata’u (ua fefefe) lea ma punonou o latou mata i le ele’ele. A ua fai mai tagata, ia te i latou, “Fa’auta, se a le mea tou te saili ai i le ua soifua i e ua oti? E leo iinei o Ia, a ua toe tu, ia outou manatu i lona fetalai atu ia te outou, ina o ia i Kalilaia o lo’o i ai o Ia. E tatau ona tu’uina atu o le Atali’i o le tagata i lima o tagata agasala, ma ia fa’asatauroina, ma toe tu mai i le aso tolu.

Ona latou manatua lea o lana fetalaiga, ma ua latou toe fo’i nai le tu’ugamau, ma ua latou o atu ma fa’amatala atu i le to’asefulu ma le tasi, atoa ma i latou uma. Ua latou fa’amatala atu ia mea i le ‘au so’o, a ua latou le talitonu foi ia te i latou. O le feau lea e fia momoli i le fanau ina ia aua ne’i i ai se taimi latou te fa’apea ane ai i le lumana’i, o le tala i le toetu o Iesu mai le oti ma le tu’ugamau, o se tala fatu e le mo’i. A ia a’oa’oina i latou ia tumau ma le mautinoa e moni le tala i le toetu o Iesu i le aso tolu, e pei ona fa’amauina i le Tusi Paia. Ia ta’u i le fanau o le Atua o lo’o tatou tapua’i i ai o le Atua manumalo i mea uma e o’o lava i le oti.

FA’ATINOGA O LE MATAUPU -

Manatu ua tatau ona amata iloa e fanau le taumafaiga a a outou Susuga i lenei masina e fa’amalosi le fatu o lo tatou fa’atuatua i nai fanau e ui lava ina laiti. Ae talitonu lava le taofi sa lava tapenea lava a outou Susuga i auala faigofie ma le gagana faigofie na momoli ai a tatou tala o le nei masina. O le mea lea ua manatu ai, e lelei ona tu’u i le fanau se avanoa i lenei Aso Sa, e tusi ai i ana laina se lua pe tolu i ana lava upu, e tau fa’amatala ane ai ia te oe ona ia lava lagona i le taua o le toetu o Iesu.

GALUEGA E FAI -

- 1. Ia tusi sau parakalafa e tolu pe fa laina, e fa’ailoa ai sau ta’utinoga e moni le tala i le toetu o Iesu. “Ou te ta’utino atu, e moni ma fa’amaoni le tala i le toetu o Iesu**

A’OA’OGA -

1. Ia polili pea le faamamafa i le talitonuina o le tala i le toetu o Iesu e le o se tala fatu.
2. Ia fiafia ia Iesu, e ala i le to’aga e alu i le LOTU, ma mea uma e ta’uta’u ai le igoa o Iesu
3. Ia taumafai e fa’ata’ita’i i amio a Iesu. Fai amio e fiafia mai ai Iesu ia te oe.
4. Fa’aopoopo e lau Susuga nisi a’oa’oga taua mo le fanau.

PESE - Fa'amasani fanau i le pese e #51, o le Tusi Pese. Fa'ai'u e lau Susuga a le faiaoga i se tatalo fa'amolemole.

Malo le galulue, faamanuia atu le Atua.

////////////////////////////////////

ASO SA - APERILA 30, 2023

MATAUPU FA'AMANATU -

SINI - Ia toe fa'amanatu mataupu sa a'oa'oina i lenei masina, ma toe fa'amalamalama pe afai ua galo i fanau, ina ia manatua pea mo le aga'i atu ina matutua."

FA'ATINOGA O LE MATAUPU -

1. E leai se 'ese'esega ma le fa'atinoga i masina ua mavae.
2. E ta'oto atu lava le faitalia i lau Susuga i le fa'agasologa o le mataupu ma lona faiga.
3. Tautuana ia aua e te to'atamai i fanau pe afai ua galo mataupu, ae toe fa'amatala ma fa'amanatu ia i latou.
4. Ia fa'afiafia pea i latou i le taulotoina o fuaiupu mai le Tusi Paia.
5. Silasila totoa ane lau Susuga a le Faiaoga , o fesili o lenei masina o lene ua fefiloi atu, sei tau sui ai foi le faasologa masani ai tatou.

(A). FESILI MA TALI -

1. O ai le tamaloa na faia le fa'amasinoga ma le fa'ai'uga e fa'asatauro Iesu?"

Tali - Pilato.

2. O ai le igoa o le pagota lea na fa'asa'oloto e Pilato? **Tali** - O Parapa.
3. O ai na fa'aosoina le motu o tagata ina ia tatala Parapa? **Tali** - O le 'au ositaulaga ma toeiina o le nu'u.
4. O le a foi le uiga o le upu Osana? **Tali** - O le fa'aola mai.
5. O le a le alalaga a tagata ina ua malaga atu Iesu i Ierusalem? **Tali** - (Mataio - 21: 4e)
6. O le a le fa'atinoga a tagata na faia ina ua afio atu le tupu i Ierusalem? **Tali** - Ua fofola o latou ofu i le ala, ua sala lala o la'au ma folasia ai le ala, ua alalaga i upu e pei ona i ai i le fesili e 6.
7. Na fa'aapefea ona iloa e Maria ua toetu Iesu? **Tali** - Ina ua fetalai Iesu ia te ia, ma tau lona igoa, *Maria e.....*
8. O ai sa i totonu o le tu'ugamau a'o tagi ai Maria? **Tali** - O agelu e to'alua o lo'o nonofo e i ulu le tasi, a'o vae le tasi.
9. O se tala moni le tala i le toetu o Iesu? **Tali** - Ioe
10. O le a sau mea o le a fai pe afai ua e talitonu ua toetu Iesu mai le oti? **Tali** - Ia fa'afetai i le Atua aua magaloa ai agasala a tagata, ia aua le fefe e ta'uta'u le tala ia Iesu toetu, ia fiafia e fai tau i au uo ua toetu Iesu e le pepelo.
11. O le a se aoaoga taua mo oe le tama ma le teine ua maua mai tala o le maliu ma le toetu o Iesu i lenei masina? **Tali** - Ia aua le masalosalo, a ia talitonu ma le fa'amaoni o le tala i le maliu ma le toetu o Iesu, e le o se tala pepelo pe fatu, o le tala moni lava na tupu.

(E). TOE FA'AMANATU TAULOTO O LE MASINA - Pei lava ona talosaga atu

fa'amolemole, ia fa'amalosia pea tamaiti e a'oa'o a latou tauloto. O le a tele se fiafia o i latou pe afai latou te taulotoina nisi o fuaitau o le Tusi Paia i lenei tausaga. O le lelei lava o le galuega lea, ia fai lava ma toe fa'amanatu mai tauloto o masina ua tuana'i.

1. **MATAIO - 27: 26** - "Ona tatalaina atu ai lea e ia o Parapa ia te i latou, a ua sasaina e ia o Iesu, ma tu'uina atu o ia ia fa'asatauroina."

2. **MATAIO - 21: 13.** *“Ua fa’apea atu o ia ia te i latou, Ua tusia, e ta’ua lo’u fale, o le fale tatalo, a ua fai e outou ma ana o e faomea”*
3. **IOANE - 20: 17.** *“Ua fetalai atu Iesu ia te ia, aua e te tago mai ia te a’u, aua ou te lei alu a’e lava i lou Tama, a ia e alu i o’u uso, ma fai atu ia i latou, ou te alu a’e i lou Tama ma lo outou tama, o lo’u Atua ma lo outou Atua”*

A’OA’OGA - Ia talanoa pea i tamaiti ina ia iloa le taua o lenei taumafaiga, ia fiafia i latou i le Tusi Paia, ma tauloto nisi o fuaitau, ia manatua ma malamalama i tala o le Tusi Paia. Manatua, e le se mea fa’aleaoga lou tautiga i le Alii.

PESE - Tu’u le avanoa i lenei Aso Sa e saunia ai e nai tamaiti ni pese e fia pepese ai, ae ta’ita’i pea lau Susuga. Fa’ai’u i se tatalo e ta’ita’i e se tamaita’i o le vasega, e amata fa’amasani ai.

FA’AFETAI TELE LE ONOSA’I, ALOFA TELE ATU.
 //////////////////////////////////////

ASO SA - ME 07, 2023

MATAUPU - “ALO’ALO ESE I LE FAI TOGAFITI PEPELO”

TUSI FAITAU - MATAIO - 28: 11 - 15.

SINI - *“Ia a’oa’oina pea le fanau ina ia ‘alo ese i togafiti pepelo, a ia fa’amasani i le tautala i le mea sa’o
 ma le amiotonu”*

FESOASOANI MO LE MATAUPU

A’o i ai Iesu i le tu’ugamau sa leoleo ai fitafita i le po ma va’ava’ai le tu’ugamau. E le’i iloa e i latou le taimi na toe tu mai ai Iesu. Sa fo’i i le nu’u fitafita po’o leoleo ma le tala ua leai se tino o Iesu. Na latou fa’ailoa atu i ositaulaga le mea ua tupu, latou te le iloa po’o fea ua alu i ai Iesu lea sa i totonu o le tu’ugamau. Ona fai lea o le togafiti leaga e ositaulaga ina ia latou pepelo i le nu’u, fai i ai na omai so’o o Iesu ma gaofi le tino o Iesu i le po. Ua fiafia leoleo po’o fitafita i lea pepelo, aua na totogi i latou i tupe. Ia latou o e tala’i i le nu’u, e le’i toe tu Iesu, ae ua gaofia e le ‘au so’o i le po.

Sa o loa tagata sa leoleo ma tala’i le tala ua gaofi e le ‘au so’o le tino o Iesu, ae le’i toe tu. Ua salalau lea tala pepelo i le nu’u atoa ma ua talitonu ai ma isi tagata. Ua fafau le tala pepelo ina ia aua ai nei o’o le oti i ai latou sa leoleo i le po. Ua latou fiafia e fau le pepelo aua ua maua ai a latou tupe. E leaga le faitogafiti pepelo, e matua leaga foi le pepelo tamaiti, ae sili ona lelei le tautala sa’o, e alofagia ai oe e Iesu.

FA’ATINOGA O LE MATAUPU

1. Ia faitau feauaui’i tamaiti ina ia lelei pea le faitauina o le Tusi Paia.
2. Fesilisili i ni upu ma fa’amalamalama le uiga o upu.
3. Ia fa’atino le tala e nisi o le vasega ina ia aliali mai ai le uiga o le loto fa’atasi e taupulepule ina ia fatu se mea e le sa’o.
4. Fa’amatala le taua o le tupe ma lona leaga, aua o le tupe o se auauna aoga tele, ae o le tupe foi o le pogai foi lea o mea leaga.

TAULOTO - *“MATAIO - 28: 12 - 13. “Ona latou fa’apotopoto ai lea fa’atasi ma toea’iina, ua latou filifili, ona avatu ai lea o tupe e tele i le ‘au, ua fa’apea atu, ia outou ta’uta’u atu, na omai ona so’o i le po ua gaofi ia te ia, a’o matou momoe”*

A’OA’OGA O LE MATAUPU

1. Aua le tautala pepelo, a ia fa’ailoa pea mea sa’o.

2. Aua le fefe e ta'u le mea moni, po'o le tautala i le sa'o.
3. E inoino ma le fiafia le Atua i le tagata tautala pepelo, ma le tautala sao.
4. O le tulafono lona fia a le Atua e i ai le - "Aua e te molimau pepelo i le lua te tuaoi."

(Tulafono e - 9, Esoto 20:16)

FESILI FA'ATUPU MANATU, E TAUANA ONA FA'AMALAMALAMA I LE FANAU -

1. Aisea na pepelo ai leoleo o le tu'ugamau?

Tali: Ona ua maua ai tupe ma le musu e fa'amaonia le toe tu o le Alii.

2. O le a le togafiti leaga na fai e ositaulaga ina ia talitonu ai le nu'u e le i toetu Iesu?

Tali: Ia latou ta'uta'u atu, na o ane so'o o Iesu i le po gaoi le tino maliu o Iesu.

PESE - Filifili lelei e lau Susuga se pese e fa'ai'u ai le mataupu, ona fa'ai'u lea i se tatalo.

MALO LE GALULUE, IA MANUIA LE ASO SA
 //////////////////////////////////////

ASO SA - ME 14, 2023. "ASO SA O TINA"

MATAUPU – "O LE MANUIA O FANAU MA AIGA, O LE FILIFILIGA A TINA"

TUSI FAITAU – LUKA 10: 38 – 42

SINI –"Ia iloa e le fanau ona maitau filifiliga a le tina i mea e manuia ai fanau ma aiga".

FESOASOANI I LE MATAUPU

O Iesu ua afe ane i le fale o Maria ma Mareta e malolo ai. Na tula'i Mareta ma alu e sauni ane se vai ma se meaa'i mo le Alii o Iesu. O Maria lona uso, ua ia fa'alologologo ma le toto'a i a'oa'oga a Iesu, Na le fiafia Mareta aua ua na'o ia o lo'o saunia le meaai, a'o Maria o lo'o nofonofono ma talatalanoa ia Iesu.

Ua fa'aali atu e Mareta ia Iesu lona mana'o, ina ia alu ane Maria e fesoasoani ia te ia. Na tali ane Iesu e tusa o lana upu, Mareta e, ua e popole, ma ua pupu lou loto i mea e tele, ae sili atu ai le mea ua faia e Maria, o lona fa'alologologo lea i upu e ola ai. O le tina e filifili tonu i mea e manuia ai le fanau, o le aiga, o le nu'u, atunu'u, ma Ekalesia. O le fa'amuamua o le fa'alologologo ma gaua'i i upu a le Alii.

FA'ATINOGA O LE MATAUPU

1. Faitau fa'atasi ma le vasega ina ia latou iloa lelei le faitauina o le Tusi Paia.
2. Se'i fa'amalamalama ane ni upu faigata o lo'o i ai i le faitauga o lenei aso.
3. Fa'atino le tala e nisi o le vasega, ina ia taofi gofie ai le mataupu.
4. E manaia ae faatino fa'apenei le matupu, Ia saunia lau Susuga a le faiaoga e fai ma Iesu, O ni tama'ita'i se to'alua e fai ma Maria ma Mareta. o Mareta o lo'o faia le kuka o mea'ai, a'o Maria, o lo'o nofo lelei e latalata i vae o Iesu.

Ia taumafai lau Susuga e a'oa'o Maria i le lauga fa'a'amuia a Iesu i luga o le mauga...ona ita ai lea o Mareta....ma fa'asolo ai lava. E pu'upu'u lava le fa'atinoga, a ia taumafai e pu'epu'e maua le fetalai'iga a Iesu ma Mareta, e pei ona tu'uina atu i le tauloto.

TAULOTO - LUKA - 10: 41 - 42. "A ua tali atu le Alii ia te ia, Mareta e, Mareta e, ua e popole, ma ua pupu lou loto i mea e tele, a'o le mea lava e tasi e ao ina ia maua, ua filifilia foi e Maria lea mea lelei, e le ave'eseina ia te ia."

A'OA'OGA

1. O le tina lelei, e fiafia o ia i mea fa'a le Atua, aemaise ai e naunau e fa'atino ona tiute i totonu o le aiga.
2. O le filifiliga sa'o ma le tonu a tina e manuia ai fanau ma aiga.
3. E to'amalie pea le tina e filifili lona loto i a'oa'oga a le Tusi Paia, e pei o Maria.
4. Ia pei tatou o Maria le lelei o ana filifiliga.
5. Fa'aopoopo ane nisi a'oa'oga faigofie mo tamaiti fa'amolemole.

FESILI FA'ATUPU MANATU -

1. O ai e sili ia te oe, i le Aso Sa o tina? **Tali** - O le tina o le tagata lava ia.
2. E fiafia lou tina ia Iesu? **Tali** - Sa'o uma tali a tamaiti.
3. O ai o Maria ma Mareta e te fia fa'ata'ita'i i ai? **Tali** - O le a to'atele e tali ane o Maria, ae a Mareta, e leaga le galuega na ia faia, o le kukaina o mea'ai mo Iesu? Fesoasoani ane lau Ssusuga fa'amolemole i le vaega lea, fa'afaigofie. .

PESE - Ai se manaia ae sa fatu sau pese mo le Aso Sa o tina e pepese ai tamaiti. Fa'ai'u i se tatalo e saunia e lau Susuga, ae fa'ata'ita'i uma i iai le vasega. Fa'afetai mo o tatou tina.

MANUIA LE GALUEGA, MANUIA FOI LE ASO SA O TINA

////////////////////////////////////

ASO SA - ME 21, 2023

MATAUPU – “O LE FEILOA'IGA A SAULO MA LE ALI'I TOETU”

TUSI FAITAU – GALUEGA - 9: 1 – 9

SINI – Ia malamalama le fanau o i na vala'auina ai Saulo, le ua igoa ia Paulo na te momoli le tala lelei i nu'u ese.

FESOASOANI MO LE MATAUPU

O tala o galuega a le 'Au Aposetolo, ma le vala'auina o Saulo, lea ua igoa ia Paulo, e alu e ave le tala lelei i nu'u ese. O ia o se tagata sa galue malosi i lalo o le malo o Roma. Na alu e saisai mai tagata mai Tamaseko e tusa ai o lona sauva i tagata Kerisiano, o i latou ua talia le talalelei ia Iesu keriso na toetu. Peita'i, na fa'ate'ia o ia ina ua taia i le pupula o le Alii ma ua le pupula ai ona mata ua tauaso.

O le malamalama mai le lagi na mafua ai ona pau o ia i le eleele. Na ia fa'alogoina le leo mai le lagi, se a le mea ua e sauva mai ai ia te a'u? O ina na suia ai le olaga o Paulo ma ua ia alu ai loa e faia le finagalo o le Atua, ae tia'i le galuega sa galue ai i le malo o Roma, o le fasiotia o tagata Kerisiano.

FA'ATINOGA O LE MATAUPU

1. Ia fa'amalosia pea le faitauina o le Tusi Paia ina ia masani pea le fanau i le faitau.
2. *Ia taumafai e fa'amatala le tala i le tusi faitau, ina ia gasolo lelei ai le mea na tupu, ma upu o le fetai'iga a le Alii toetu ma Saulo. Ua fa'apu'upu'u atu fa'amolemole.*
3. Ia fa'asoa i ni vaega e le o manino i le faitauga o le nei Aso Sa.
4. Fa'atino ane le mataupu e nisi o le vasega ina ia iloa ai le mea na tupu ia Saulo po'o Paulo.
5. Fesili i le vasega pe to'afia nisi e fia fai ma Paulo i le lumana'i?

TAULOTO - GALUEGA - 9: 6 “*Ua gatete ia ma ua mata'u, ua fa'apea atu, Le Alii e, se a le mea e te finagalo i ai ou te faia? Ona fetalai mai lea o le Alii ia te ia, Tu ia oe i luga, ma alu i le a'ai, ona ta'uina atu lea ia te oe o le mea e tusa ona e faia.*”

A'OA'OGA

1. E mafai foi ona filifilia tatou tamaiti e le Atua e faia lana galuega i ni aso oi luma.
2. Ia tatou usiusita'i pe a vala'au mai, le Alii toetu i mea e tatau ona tatou faia.
3. Aua le ulavale i le Atua, aua e i'u leaga pei o Saulo, na fetaia'i lava ma le malamalama o le Alii, tauaso ona mata,
4. Afai o oe o se tama po'o se teine ulavale ma fa'alogoga, e mana'o le Alii e sui lau amio lena.
5. Fa'afai'ofie nisi a'oa'oga e tele o le tala.

PESE – Fa'ata'ita'i i le fanau le fati ma se fuaiupu o le pese #259, o le tatou tusi pese. Fa'ai'u i se tatalo e ta'ita'i e se alii o le vasega.

MANUIA LENEI ASO SA

////////////////////////////////////

ASO SA - ME 28, 2023. “ASO SA PENETEKOSO”

MATAUPU - “UA FILIFIA SAULO I LE GALUEGA A LE ALII”

TUSI FAITAU – GALUEGA 9: 10 – 19

SINI – Ia malamalama le fanau i fesuia'iga e faia e le Alii i le olaga o le tagata, pe a o'o ina maua e le mana o le Agaga Paia.

FESOASOANI MO LE MATAUPU

I le Aso Sa ua tuana'i sa tauaso ai Saulo ina ua taia i le malamalama o le Atua i le ala i Tamaseko. Ua atoa le tolu aso, na te le'i iloina se mea. Ua le mafai foi e ia ona ai pe inu i le tolu o aso.

A'o le Aso Sa lenei, ua fa'auau pea ma tulimata'i le mea sa tupu ia Saulo po'o Paulo i lona igoa fou ua i ai nei. Ua fa'atonu e le Atua. Anania e alu e fa'au'u ia Saulo, ina ia fai ma auauna e tala'i lona finagalo i nu'u ese.

Na alu Anania ma fa'au'u ia Saulo ma papatiso ia te ia, e tusa o le finagalo o le Atua. Ua suia ai ma lona igoa, ua pupula ona mata, ua 'ai ma inu, ma ua malosi. Ona fa'apea lea o upu a Anania le ositaulaga, “Lo'u uso e, Saulo, ua 'auina mai 'au e le Alii o Iesu, sa fa'aali ia te oe i le ala na e sau ai, ina ia e toe va'ai ma fa'atumuina oe e le Agaga Paia.” Ia maua le Agaga Paia le fesoasoani sili mo i tatou. I lana galuega, ma o tatou olaga. Tatou te le mafai lava se mea i lo tataou malosi, se'ii vagana le malosi ma le mana o le Agaga Paia. E mafai suiga tetele i o tatou olaga, pe a tatou maua le Agaga Paia o le Atua, O le aso sa lenei o le Penetekoso, o le afio ifo o le Agaga Paia i luga o le 'au so'o, na afua ai ona maua le malosi ma le mana. E pei ona poloa'i ai le Alii i ona so'o e fa'atali i le afio ifo o le Agaga Paia e o ai e fai le galuega.

FA'ATINOGA O LE MATAUPU

1. Ia manino la latou faita'u, aua afai e lelei le faitauina o le Tusi Paia, e faigofie ona malamalama.
2. Fetufaa'i ma le vasega i ni upu e le malamalama ai.
3. E mafai foi ona fa'atino le tala, ae fa'asolo lelei i tagata ma le fa'agasologa o lo'o i ai i le tala. Ua 'oto'oto atu, ae fa'agasolo pea le fa'amatalaina ma le fa'atinoina mai le Tusi Paia.
4. Ia taumafai lava e fai fesili ina ia mafai ona o latou tautatala mai.
5. Ia manatua lava aua nei galo, ia fa'amatala le uiga o le Penetekoso i nai fanau ina ia latou iloa ai le taua o lenei aso sa fa'amanatuina.

TAULOTO - GALUEGA - 9: 17e. “...Lo’u uso e, Saulo, ua ‘auina mai ‘au e le Alii o Iesu, sa fa’aali ia te oe i le ala na e sau ai, ina ia e toe va’ai ma fa’atumuina oe i le Agaga Paia.”

A’OA’OGA -

1. Ia manatua e le mafai ona tatou taofia suiga e fai e le Atua i o tatou olaga.
2. Aua tatou te fiafia e ula ma fa’atauemu i le lotu, aua e tau mai le Atua ia i tatou.
3. E alofa pea le Atua ia i tatou tusa lava pe tele a tatou mea sese ma leaga e faia. Ae manatua e le tu’ufaua e le Atua tatou e fai pea le leaga, e a’oa’i mai lava.
4. E mana’o le Atua ia tatou ola mo ia, ae aua ne’i oti i le malaia.

PESE - “Ua ou filifili e mulimuli ia Iesu” Fa’amasani foi i le pese #180, o le tusi pese.

MANUIA TELE GALUEGA O LE ASO SA.

////////////////////////////////////

ASO SA - IUNI 04, 2023.

MATAUPU – O LE SUAFA O IESU KERISO NA SAVALI AI LE PIPILI”

TUSI FAITAU – GALUEGA 3: 1 – 10

SINI – Ia iloa ma malamalama tamaiti, e mafaia e le malosi o le suafa o Iesu ona fa’aolaina le tagata. O le suafa o Iesu o lo’o i ai le mana po’o le malosi.

FESOASOANI I LE MATAUPU

Ua mavae atu le taimi sa i ai fa’atasi Iesu ma ona so’o i le lalolagi, a ua tu’ua nei na’o so’o le galuega. Ua fa’asolo le galuega tala’i a le ‘Au Aposetolo, ina ia o latou faia le galuega na tu’uina atu e Iesu latou te fa’aaauina.

O Peteru la ma Ioane o i laua ia o so’o o le Alii, ua galulue ma fa’asolo pea le tala’iga i lea nu’u ma lea a’ai. Ua la o a’e i le malumalu e masani ona o e fai ai talosaga ma tapua’iga. Ua la va’aia ai le tagata pipili, ua fai ma ana masani le nofonono ai i fafo o le fa’apaologa, e ‘aisi ai mo se meaalofa. Na manatu lenei pipili, o le a maua ai sana tupe ia Peteru ma Ioane, ae peita’i, na fai i ai le ‘au so’o, e leai se auro po’o se ario ua ia te’i laua, ae na’o le suafa o Iesu le Nasareta, e fai atu ai, e tula’i ai ma savali.

O le tagata pipili ua tu ma savali ona o le malosi o le mana o le suafa o le Alii. O le malosi lea o le galuega a le Agaga Paia, e mafaia ai e le tagata galue ma le fa’atuatua i le Alii toetu ma mafaia ai vavega i lona suafa. Ua na o le Agaga Paia lava tatou te malolosi ai mo le Alii, lea na poloa’i ai e afio i le lagi ae ‘auina ifo le fesoasoani sili mo le tagata, o le Agaga Paia lea ma le malosI o lona mana.

FA’AMANATU FA’AMOLEMOLE -

Ia fa’amatala pea le tala i le gasologa o lo’o i ai mai le amataga, se’ia o’o i le fuaiupu e 10. Ua taumafai lava e fa’apu’upu’u atu, ae fa’amoemoe atu lava i lau tapenaga o le vaiaso, o le a sologa lelei ai le tala ma malamalama gofie i fanau. Ia taula’i pea lau fa’amatalaga i upu ma gaoioiga o lo’o taua i le tusi faitau.

FA’ATINOGA O LE MATAUPU

1. Ia faitau manino le Tusi Paia, ia fa’asa’osa’o pea le fa’aleoga o upu, ma fa’ailoga.
2. Fa’amolemole faiaoga, ia fa’asolo lelei le tala i lona fa’asologa o lo’o i ai i le tusi faitau.
3. Ia maitauina lelei foi tagata o le tala, ma a latou upu ma tala o lo’o fai.

4. Ia fa'atino ai i le gasologa lena le tala, a uma, ona fa'atalanoa loa lea o le tala ma fa'amalamalama i tamaiti.

O NISI O UPU E FIA FA'AMALAMALAMA I TAMAITI -

1. Matagofie - O le igoa o le malumalu i Ierusalem. (fa'apaologa)
2. fa'atoga - aio'i, 'aisi
3. pulato'a - sioa, ua le emo mata i se mea o pupula i ai.
4. segia le maui - ua nofo le manava i ni sekone, matapogia ona o le te'i ma le ofo....

TAULOTO – GALUEGA 3: 5 - 6. “Ona naunau mai ai lea o ia ia te i laua, fa’i e maua se mea mai ia te i laua, A ua fai atu Peteru, e leai sa’u ario po’o sa’u auro, a o le mea ua ia te a’u, ou te avatu lea ia te oe, o le suafa o Iesu Keriso o le Nasareta, ou te fai atu ai, ina savali ia.”

A’OA’OGA

1. E leai se isi malosi tatou te mafaia ai so’o se mea, ua na’o le mana ma le malosi o le suafa o Iesu Keriso le Nasareta, e mafai ai ona tatou faia mea uma lava.
2. Ia naunau tatou te maua pea le malosi o le Agaga Paia, e fai ai a tatou galuega.
3. Saunia e lau Susuga nisi fesili ma ni a’oa’oga e ‘oa atili ai le mataupu fa’amolemole.

PESE - Pese a le Aoga Aso Sa, “Savali ma oso, ma vivi’i i le Atua.....

IA MANUIA LE TAPUAIGA, ALOFA ATU

////////////////////////////////////

ASO SA - IUNI 11, 2023

MATAUPU - UA TOE FA’AOLAINA TAPITA E PETERU”

TUSI FAITAU – GALUEGA 9:36 – 43

SINI – O le tatalo a Peteru i le Atua na maua ai le mana ma le malosi, na mafua ai ona toe ola mai le so’o fafine sa oti.

FESOASOANI MO LE MATAUPU

O le galuega a Peteru o lo’o fa’aaauu pea lana tala’i atu i a’ai uma o Ierusalem. I le nu’u o Iopa lea ua o’o i ai lana galuega fa’aola. O le malosi o le tala’iga a Peteru, e maua mai i le fesoasoani tele a le Agaga Paia.

Ua to’atele tagata ua liliu i le Alii ma fa’atuatua i ai i ia ona po. Na fa’ate’ia Peteru ina ua alu ane le fe’au e mana’omia o ia e tagata Iopa. Sa le’i fa’atali Peteru ae alu ane loa e tusa o le mana’o o tagata. Na taunu’u Peteru i le afeafe aupitoaluga, i le nofoaga o lo’o fa’atali mai ai tagata ia te ia, aua ua fa’alogo tagata i vavega na faia e Peteru a’o feagai ma le tala’iga.

O **Tapita** la, o le so’o fafine ua oti, a’o lona igoa e iloa ai o ia e tagata, o **Toreka** aua e fa’amatala ai galuega lelei a leni tina. E potu e su’isu’i. Na aio’i mai fafine ia Peteru, ma fa’aali mai ia te ia ofu a o latou ta’ito’alua ua feoti, ae le galo galuega lelei a lea tina. Na to’otuli Peteru ma tatalo fa’atauanau atu i le Atua ina ia toe ola mai Tapita. Ua tali mai le Atua ma ua toe ola mai le fafine. O le mana lava o le Agaga Paia, ma le tatalo fa’atuatua i le Atua, e maua ai le malosi lilo na tutupu ai vavega i le galuega a Peteru. Tatou te mafaia foi tamaiti mea faigata, pe a fa’atumuina i tatou i le Agaga Paia.

FA’ATINOGA O LE MATAUPU

1. Ia faitau felafolafoa’i tama ma teine i leni taeao, ae fa’asa’osa’o pea lau Susuga a le Faiaoga.
2. Fesilisili pe i ai ni upu e le o malamalama ai le vasega.
3. Tu’u le avanoa e tatalo mai ai se tasi e amata ai le a’oga.

4. Ia fa'amatala ma a'oa'o le tala i le fa'agasologa o lo'o i ai i le tusi faitau, ia faigofie i tamaiti. A'o le fesoasoani ua tu'uina atu, e mo lau Susuga a le faiaoga fa'amolemole.

TAULOTO - GALUEGA - 9: 40. *“A ua tuli atu Peteru ia te i latou uma lava i fafo, ona to'otuli lea o ia, ma tatalo, ona fa'asaga atu lea o ia i le oti, ua fa'apea atu, “Tapita e, ina tu ia i luga” Ua pupula o ia, ua na iloa Peteru, ona nofo lea i luga.”*

A'OA'OGA

1. O le tatalo fa'atauana i le Atua, e tali mai ai o ia e tusa o le fa'atuatua ua ia te i tatou.
2. O le taleni su'isu'i a Toreka po'o Tapita, na misia ai o ia e fafine ina ua oti o ia.
3. Fa'aaoga tatau sau taleni ia manuia ai au uo ma nisi tagata ia te oe.
4. E fa'agalo gata le tagata lelei pe a oti.
5. Fa'amasani i le olaga tatalo ma to'aga e faitau le Tusi Paia.

PESE - Fa'amasani se fuaiupu o le pese #157, e fa'ata'ita'i ai le fanau, ia pe saili foi e lau Susuga se pese faigofie e iloa uma. Fa'ai'u i le tatalo a le Alii.

MANUIA GALUEGA O LENEI ASO SA.

////////////////////////////////////

ASO SA - IUNI 18, 2023. “ASO SA O TAMA”

MATAUPU – “O LE ALOFA FA'ATAMA”

TUSI FAITAU – LUKA 15; 11 – 32

SINI – E le fa'apito le alofa o le Tama i totonu o lona aiga, ae tutusa uma le alofa i lana fanau.

FESOASOANI MO LE MATAUPU

O le fa'ata'oto ua tatou masani ai lava i le Tusi Paia, ae na ona ou toe fesoasoani atu i se ala faigofie. O le tama ma lana fanau tama e to'alua. Sa lelei ma mautu le aiga, maua mea uma, e o'o lava i le fiafia, sa i ai lava i totonu o le aiga lea. Peita'i, ua manatu lava le tama la'iitiiti o le fanau, se'i alu e fai se su'iga o lona olaga mai lona aiga. O lea na tonu ai i lona loto, o le a alu e tafao i le lalolagi, aua e mautinoa lava e to'atele ana uo o le a maua. Na fai i lona tama o ia ua mana'o se'i alu e eva ma fa'afiafia o ia i le lalolagi. Na tu'uina i ai e lona tama lana vaega o le 'oa po'o tupe ona alu 'ese fiafia loa lea. A'o le tama matua, sa nonofo lava ma lo la tama i le aiga.

Ua alu aso ae sau foi isi aso, ua o'o ina iloa e le tama so'ona ulavale i le lalolagi, ua uma ana tupe, ua leai ni ana uo, ua mativa, ua fia 'ai ma fia inu, ua leai se isi e lavea'i lona olaga to'ilalo ua o'o i ai. Sa sa'ili i se galuega, ua na o le fafagaina o pua'a a le tasi tagata, ma maua ai sana mea'ai fa'atasi ma pua'a.

Tamaiti, e leaga le mana'o e alu 'ese ma le aiga ae alu e tafaovale i le lalolagi. Manatua tamaiti, o le upu moni lava, e na'o lou aiga lava e te maua ai le fiafai moni ma le loto malie. E te le maua lava i se isi mea o le lalolagi, aisea? aua o lo'o i ai ou matua, uso ma tuafafine ma tuagane.

Ina ua o'o le tama la'ititi i le leaga o le a'ai fa'atasi ma pua'a, o i'ina na manatua ai lona aiga ma lona tama, aemaise o lona uso matua, Sa ia iloa lelei e leai se mea e fa'aletonu i lona aiga a'o latou fa'atasi, E le mativa i se mea e tasi, e o'o lava i mea'ai. O lana filifiliga poto tamaiti, na manatu ai

lava e toe foi i lona aiga, tusa lava po’o le a lona leaga sa ia faia. Na alu ma le loto ua salamo i lana mea sa fai.

Fai mai le tala tamaiti, na talia lelei o ia e lona tama ina ua fo’i atu i le aiga. Na fai le ‘aiga fiafia a le aiga, (*fa’amatala mea na tutupu i le ‘aiga fa’amolemeole faiaoga*) aua o lona atali’i na oti, a ua toe ola mai, na leiloa foi, a ua toe maua.

FA’ATINOGA O LE MATAUPU

1. Fa’amalolosi pea e faitau le Tusi Paia, ia maua le fa’amoemoe o lea vaega o le a’oa’oina o fanau, Ia lelei le faitau mo le lumana’i, ma ia fai ma fiafiaga tumau le faitau Tusi Paia.
2. Fa’asoa i ni upu e le o manino ia te i latou, fa’amatala i le fa’asologa o le tala i le tusi faitau
3. O le tala masani, ae fou i nisi o tamaiti, ia po’o le galo foi i tamaiti uma.
4. O le fa’atino lava o le tala le metotia e taofi gofie ai le fanau, aua ua faigofie i lau Susuga le tala.

A’OA’OGA

1. O le alofa o le Tama, e le fa’atuaolia e fa’asalafa i tagata uma o le aiga. O le alofa e onosa’i ma fa’apalepale i taimi uma.
2. E faapena le alofa o le Atua i tagata uma lava.
3. Ia e alofa i lou tama ma usitai i ai, ae aua le fiapoto i lou tama.
4. Ia manatua o lou aiga e maua ai le fiafia moni, ae le o le tafaovale i le lalolagi.
5. E alofa pea lou tama ma lou tina ia te oe le la tama, tusa lava po’o fea e o’o i ai lou leaga, ma lou le usita’i. Ae aua le avea le alofa lena ma mea e te fa’afiapoto ai i ou matua.

PESE - E manatua lava le pese #375, o le tusi pese, Fa’ata’ita’i sina fuaiupu mo le fanau.

MANUIA TELE LE ASO SA O TAMA, ALOFA ATU I TAMA.

////////////////////////////////////

ASO SA - IUNI 25, 2023

MATAUPU - SUEGA O LE ‘AFA TAUSAGA

SINI - O le toe fa’amanatu lava ma toe tuli tatao le galuega sa outou gapatia ai i le lima masina o le amataga o lenei tausaga. E le gata mo le lelei o fanau, ae ia mautinoa lelei ai e a outou Susuga, e le se mea fa’aleaoga lo outou tautiga i le Alii, e ala i le a’oa’oina o fanau i le Tusi Paia.

FA’ATINOGA O LE SU’EGA

1. E leai se suiga o fa’atinoga, aua o lo’o i lau Susuga lava le silafia e fa’afoe ai lea fa’amoemoe, e fua lava i le matutua o le fanau..
2. Tautuana ia ma’ea le su’ega po’o le a lava le faiga e te fa’atino ina ai (tali gutu po’o le tali tusitusi), ia mautinoa ia toe fa’amalamalama i fanau tali sa’o o fesili ina ia maua atili e i latou.
3. O le a pule lava lau Susuga i le tapenaga o fesili, pe fa’aaoga foi fesili o lo’o i mataupu sa talanoaina i nei masina, ua lelei tele foi lena.

4. Pule lau susuga i le togiina o le su'ega, ae tautuana ia fa'afiafia pea i latou i o latou tulaga. Fa'aioa pea i ai e tutusa uma o latou togi i le tulaga muamua, ae maitau ma taofi pea e lau Susuga le aga'i i luma o lea tamaitiiti ma lea tamaitiiti. O le fa'amoemoe ina ia aua ne'i avea le tulaga ma ala e fiu ai e toe fa'atali isi tamaiti ua le fia i ai.
5. Afai e maua ni nai fa'aioa laiti mo nai tamaiti po'o se aisa kulimi foi, ua uma le case.

VAEGA LUA

1. Fa'amolemole Faiaoga, o le vaega lua o le su'ega, e i ai lava le manatu e tataua ona asia pea a latou tauloto sa a'oa'oina.
2. Manatua, e i ai mataupu e le o i ai ni tauloto sa a'oa'oina ai, o le fa'amoemoe ina ia le tele ni tauloto e a'o, ae ia tele ni tauloto e maua uma e le fanau.
3. O le ala lea ua manatu ai afai e maua uma tauloto a le fanau sa a'oa'oina i lenei 'afa tausaga, ua matua fa'amalieina lo outou gapatia i le galuega tele sa outou galulue ai.

A'OA'OGA -

1. O le a'oa'oga sili lava o lenei Aso Sa, o le mautinoa lea i lau silasila o lo'o taofi fanau i mataupu sa a'oa'oina ai. Ave i ai sau fa'afetai ma sau fa'amalo i nai fanau mo lenei 'afa tausaga ua ma'ea.
2. Ona momoli loa lea i ai o se fa'amalosi ina ia fa'amalolosi ane pea i le Aoga Aso Sa i le 'afa mulimuli o le tausaga, pe a sopo i ai le soifua ma le ola.
3. Fa'amanuia i ai le malologa ma tima'i i ai ina ia mataala ma mata'alia, e le moe le fili ma le alii o le lalolagi e fa'aosooso i latou i le leaga.
4. Ia toa'aga e fa'aauau le o ane i le LOTU a'o feagai ai ma le malologa.

Fa'ai'u i se pese e maua uma e le fanau, ona tatalo lea o lau Susuga a le Faiaoga e talosia le malologa o le a fegai ma fanau.

MALO LE GALULUE, FA'AFETAI LE LAGOLAGO MAI, VI'IA LE ALII I LO OUTOU SOIFUA OFOINA MO IA. MANUIA LE MALOLOGA.

TATOU FEILOA IA AUKUSO - 2023, PE A PULE ALOFA LE ATUA TATOU TE AULIA

////////////////////////////////////



Tautua Printing Press
Congregational Christian Church of American Samoa
1 Kanana Fou Street, Box 1537
Pago Pago, American Samoa 96799
www.efkasonline.org

